



袁文榮公文集卷之六

○進士題名記

嘉靖壬戌春三月我

皇上率由彝典策試天下士



親賜品隲等其甲第自徐時行而下凡二百九

十有九人維時臣猥廁讀卷獲觀諸士敷

納之言焉先是二月臣受

命往主會試事芻蕘慎選拔士之尤者以奉

大對茲復承

明詔俾臣記題名之石後先凡三荷

任使其可謂至榮幸矣因復自念曩歲戊戌
蒙

恩賜及第迄今二十有五年遭逢

神聖洵歷清華

簡寘密勿

眷遇非常每誓捐糜以圖報稱惴惴焉懼無能
也所藉手以答

聖恩於萬一者無亦於諸士是望乎夫士出而
嚮用必有所當戒亦必有所當法其當戒
者若黷貨若峻刑若縱度弱植諸所弗類

臣於錄之首簡既已析言之矣其所當法
者敢因記而申最之臣伏觀

今日萬寓又康羣生訴懌北陲息警南服澄
氛

中興盛治蒸蒸然與邃古比隆顧其本在

聖心而其要在得人焉爾書有之俊又在官百
僚師師夫師之爲言法也我

皇上含靈體睿出天入神臨照百官洞悉羣隱
莫有能毫髮遁者中外之臣咸凜凜焉祗
畏恪恭爭自磨濯大法小廉以對揚

麻命此大十載一時也諸士生當熙會舍今其
奚法耶夫逖希而遐倣或阻於形迹之岐
躬覲而邇摩恒得於景行之切諸士脫跡
草茅沾被

榮寵成進士矣乃茲布列近署旬宣四方造英
哲之林定向往之的惟善所在則而倣之
觀感以思齊和衷而共濟內之分疇采而
贊謨謀外之惠黎元而流聲績式遵近軌
允迪徽猷相與勉焉以翊
國家靈長之運以不負

皇上陶育之澤亦庶幾哉唐虞師師之盛矣若
乃渥古而薄今侈名而眩實游意臯夔馳
神稷契是其志趣非不曠然詣闕廓也至
閱其所施樹視古人大有逕庭將不謂之
靜言而庸違乎此非臣所爲諸士望者也
諸士尚繹思而決擇焉臣謹記

○重修盧溝河隄記

我

皇上受命於穆清湛恩汪濊羣生澍濡暢垓泝
挺淪浹乎無外百神效職川岳奠位天下

晏如矣然

聖心以博施濟衆治化之極功也而一夫其咨
一區或墊罔不時恫而俾乂焉維此盧溝
河者源深流衍襟帶

都城之西橋亘周行四方輻輳金至而會項
年沙洲突起下流填闕水失其故道墮隄
而决衢殫爲河觸山阜漂田廬走西南百
餘里行者病涉耕者釋耒居者無寧宇事
聞

皇上意惻然憫之若曰朕祗承

土女大德利濟元元顧此河在輦轂下盍亟治
之以弭民患爰

遣工部尚書雷禮暨掌工尚書徐杲等相度規
畫條上其事宜

皇上發帑銀三萬五千兩有餘而

敕太監張崇侍郎呂光洵指揮同知張鐸御史
雷稽古董其役仍令禮月一往視經始於
嘉靖壬戌秋九月報成於癸亥夏四月凡
爲隄延袤一千二百丈高一丈有奇廣倍
之崇基密楨累石重甃鱗鱗比比翼如屹

如較昔所修築堅固什伯矣於是臣禮
請立石紀其事以宣揚休烈垂示永久乃

命臣熹爲之記臣惟大禹之治水疏江導河濬
川灑澤東歸之於海既而攸同攸宅諸夏
又安功施于無極若漢之治決河沈璧馬
與人徒從官負薪歷數歲弗能塞蓋讀瓠
子之嘒而成功之難猶可想見今我
皇上福民拯世之心昭格

穹昊乃神明助順臣庶協勤河伯川祗顯著靈
應甫及半載而隄鞏新築水循舊流皓旰

復爲原陸沮洳化爲隰畛旅嘒載途農謳
溢野而登降移徙之民胥慶于室是

皇上利濟之鴻仁與大禹平成之不績侔盛比
隆皆將萬世永賴天壤俱流矣其視漢人
之宣房謹謹焉補苴一時者何丁埒語耶
是役也財出諸

御府夫取諸營卒而貲稱不給者工部以羨餘
佐之官不知費民不知勞而適觀厥成焉
若水之源委及頻年修治之蹟語在諸臣
碑記中臣不復論著云

○寶翰樓記

豫章郡城之東湖周廣數里渟澄滉瀆境號為最勝據湖之上旅楹駢柱跂如翼如者者德堂也堂之左有樓焉重屋層阿翬飛鳳舉亭亭然于青霄而出者寶翰之樓也堂與樓今少師介翁嚴公之所建而名額則

皇上親定以賜公者也公遭際

神聖由秩宗簡置丞弼獨秉鈞軸幾二十年如耳目應心股肱運形信任眷倚久而愈篤

密劄祕諭詢謀獎答一日四三下克筭盈篋

無慮千數公念

宸藻奎畫重逾天球弘壁特建斯樓併以累賜

誥敕及詩若書崇奉珍藏而世守之乃命煒紀其事某竊惟大江以西匡廬為鎮彭蠡為浸域中名山大川莫之能先焉靈和所鍾名賢碩輔挺生其間者後先相望然其受異知膺殊遇恩禮超絕而堂構之名出自睿題以照灼宇宙者則惟公一人而已夫紆寶

思於天章則長河韜映摘玉筆於仙劄則
流霞成采茲樓屹立豫章攬結匡廬之秀
襟帶彭蠡之雄而至寶所貯上射斗牛下
飭萬物則五峯之巘嶸九江之波濤豈不
若增而高若增而廣也耶然則斯樓凌抗
古今鎮壓吳楚春風物華之樓滕王涵虛
之閣皆不得以擅其奇矣豈止一時之偉
觀已邪矧公之勛業磅礴霄漢與匡廬爭
高公之德澤流注江河與彭蠡爭深天下
相與誦誦之將垂芳信史揚輝金石以施
於無窮而焯也以特記斯樓之盛未暇悉
論著云

○寧國府重修儒學碑記

寧國稱山水郡其地繁會其謠俗和柔安
阜寔江表之隩區焉乃今則爲留都股肱
郡澤漸化洽士之起黌校而儀羽王路者
翩翩然輩出相隨屬矣郡學舊建於城東
而改建於郡治之南則洪武初太守黃公
榮祖云厥後新而敝敝而修代相沿革徵
諸文獻紀述可考鏡也嘉靖己亥郡守曹

公邁復葺新之顧梓人匪良規崇而材弱
有識者預危其就圯非久圖也歲壬子蜀
初臬劉公來守是郡甫視事即察政敝之
太甚者釐正之已乃舉廢振墜蒸蒸然百
度咸新矣詣學瞻拜覩廟宇傾仄低徊惘
然意亟新之未暇遑也既癸丑春月積雨
彌旬忽報顛仆公曰吾固虞其有此也然
前之覆後之鑒自今改新之可不懷永圖
乎乃條其事於諸當道諸當道具報允公
殫思規畫鳩工庀材命宣城尉麥穗董其

役經始於癸丑之七月落成於甲寅之正
月殿廡翬革堂宇靚深庖庫廨舍井如奕
如官不知費民不知勞而舊觀增勝隆構
在瞻矣郡教授徐君沛以公有新學貞教
崇化育賢之功將伐石紀其事走使弊乞
言於余余與公同舉進士而教授君又余
鄉同年友也乃不容以不文辭昔公在諫
垣時余與公聯邸第得數從公游雅接緒
論已知公淑稟淵造蚤聞聖人之學矣乃
茲徊翔中外操慮危深公所詣益純所養

益邃其發而措之政比隆古人之偉烈無
惑也余請因公之修學而贊之夫聖人之
學在吾心而其道在六經六經也者聖人
所以陳吾心之精蘊而出之以彌綸天下
也故曰欲觀聖人之精則於其渾然者已
言道之涵於心也欲觀聖人之迹則於其
粲然者已言道之著於經也是以學者之
明經內之窮神知化妙契本原外之參天
兩地顯設事功求不悖聖人之道焉爾矣
國家以道立治以經選士士之窮經以效

用者雲蒸霧滃其置山出郁乎斌斌也然
上者談性命病六經爲粗迹次者工辭章
詆六經爲陳言其能闡繹道真探索聖蘊
擷六經之精華而施樹聲實者若而人哉
大道之公也與三代之英靡得而企已漢
諸薦紳先生文翁化蜀厥有春秋平當行
河厥有禹貢顛君典郡本之文雅彭宣司
牧獲諸讐易君公射策甘棠沛郡翁卿明
經子惠南陽至孔安國龔少卿之徒此皆
所謂經生學士也籍於民社之寄發其素

業廩廩焉便宜以爲治雖所施殊科然皆以本原而出之事功焉窮經而曾漢儒之弗及尚矣取於今之士耶夫修學宮以迪士者郡師帥之職也修經術以翼世者多士之責也寧國固首善地異材間出茲又得學士仁人爲之表率容可誦經以自負哉不然即含章舒藻揮翰流離稱述世務探賾索奇使揚班韜筆仲舒結舌亦文人之雄耳其於聖人之經奚裨哉

○休寧縣重修儒學記

休寧邑萬山中羣峯綺錯溪流紺澄蓋江左稱奇勝邑云以故儲和發祥代毓英俊古今相輝映焉嘉靖癸丑冬月余以請告暇往謁齊雲山神間行道休邑邑令三泉林侯覺而追余於逆旅侯機神朗徹儀度肅雝引與坐語劇對貞亮而不詭於道余即心異重之已而邑博士劉君熠戴君瑞繼至兩博士皆余鄉人士遂復坐深語因共析人心道心危微之旨侯洞識淵祕獨窺其精余益竦然敬服焉翼日余就行兩

博士率其弟子員某某揖余而請曰休廟
學闕歲久且壞寔賴侯改新之乃今奕奕
然觀成矣茲侯有崇聖廸文育賢敷化之
功願先生立言紀諸石余諾其請而行明
年甲寅春正月劉君召爲國學博士往矣
戴君以書抵余曰新宮有爽貞石在藎吾
師生需先生之文亟矣敢走使以請余惟
休學之沿革繫於時興替存乎其人志諸
文獻炳乎可攷鏡也又奚俟余論著哉余
獨慨道心爲聖學之源苞曜於唐虞紹真

於三代純明於孔孟秦漢以降渺邈千載
竟俾之晦蝕而弗章余乃與林侯兩博士
傾蓋數言怡然順釋不可以見道心之躍
如耶夫虛靈靜定渾然在中不睹不聞至
顯而微此道心之妙而人心不得以間之
也古之聖賢惟精惟一允執其中所以防
人心之危而全其本然之微也聖遠教湮
精一淪喪異說譁衆以汨其真天下之士
奪易迷瞽爭鶩於辭章功利之習至使人
心日危聖學中絕而吾精微之道心天飛

淵隆若漠然非所固有者乃士風民俗吏
治世運日焚焚焉些窳而莫可捄止知道
君子徃徃徘徊竊歎思所以措手維持之
弗克也林侯治休之政比隆曩初而握機
舉要首先化原學宮之新既已豫多士敬
業之地矣無亦闡妙契之心學以振滌其
成習乎新安稱異材間出土務高節竒行
誠灼此心以標示之有不爽然失憬然悟
翕然相觀而不式耶藉令多士服方矩步
委蛇於新廟容與於澤宮不知講明精一
執中之學以存道心之微即章甫如星逢
掖如雲聚學爲海淬詞爲鋒翩翩乎儀羽
臺閣揚光紫微亦辭章功利之習爾其身
心之學曷所裨益哉是役也財取諸贖工
取諸顧官不知費民不知勞肇事於癸丑
之夏落成於甲寅之春凡九閱月而祠宇
軒翔宮門歛艷廨舍靚深庖湍鱗次視前
修益弘麗云

○永平府重修清節廟碑記

孤竹爲殷商侯永平其故墟也永平廟祀

夷齊舊矣厥興廢所由郡志載之詳可考也嘉靖丙午兵部尚書郎石州張君玘出守是邦瀕行夢神人持二墨贈且曰若守土有兄弟二人君其善待之君不解所指覺而語諸人人曰夷齊墨台氏二子君夢所見其是乎君心殊異之比蒞郡徃謁夷齊祠周視之堂止四楹規制湫隘歲且久棟宇傾圯漫漶不可支矣君愴然感焉顧謂同知蘇君烈推官霍君冀曰古仁賢祠宇乃使之頽敝弗葺咎將誰執邪即與二

君謀新之然以其費不貲不敢專列狀上撫巡諸臺以請中丞孫公應奎侍御吳君相車君邦佑王君應鐘張君登高王君達咸韙君議而孫公嘉樂獎成之尤力公命取燕河桃林巨木百餘章爲梁棟而諸侍御各助贖金若干兩戶部郎張君某復使來告君曰聞君新仁賢祠以崇化礪俗願以百金做經費君乃益自喜謂蘇霍二君曰羣志協從茲役易集矣乃檄灤州守及盧龍縣令輸金鳩匠伐石具材君躬爲區

畫授以燹度既而工人競勸邦民子來公
私靡侵新廟有奕肇事於丁未秋七月訖
工於巳酉冬十一月爲堂五楹兩廡各七
楹儀門三楹堂之後亦三楹扁之曰揖遜
齋房六楹扁其左爲齊明右爲盥薦揖遜
堂後曰清風臺築堅之而衛以石孫公更
其扁爲采薇亭祠之前爲大門三左右扁
之曰天地綱常曰古今師範門之前爲坊
曰清節廟堂宇靚深形制宏敞輪奐輝赫
山川改觀不有以褒表聖賢翊振風教垂

功烈於不朽哉廟成將樹碑記其事君走
使徵文於余余惟忠孝節讓乃天理之根
於人心者萬古常新夷齊當商周之際遵
命以成孝諫伐以全忠遜國以惇讓采薇
以明節是惟求足乎吾心之理而非以要
後之人崇慕不窮也乃今張君感諸夢思
而新廟之議達諸撫巡諸君子罔不翕然
孚允行之豈有政教徵發哉忠孝節讓各
牖其衷夷齊高蹈千載如挹是役之就緒
非所謂天之所符而人心自然之驗耶張

君字某舉乙未進士以清節著稱今升秩
陝西副使嚮用未艾云

少保南渠李公生祠記

嘉靖乙卯倭夷大犯海上浙守臣並走驛

馬詰

闕告東南急少保南渠李公歎曰茲甌內訌
外構其孽牙未易刈也古者禮失則守在
險吾姚通甌明縮轂其口東連大海倭艘
乘颶抵丘洋即傾刻薄境內有如賊欲窺
臨安掃衆出姚江姚人不能嬰城守則會

稽失其外蔽而全浙聳矣吾邑治江北故
有城而江南居民以數萬計學宮在焉士
之抱俎豆而講業者羣聚於其間冀未有
縈帶之衛又轉輸之所待也一旦賊至棄
江南而守孤城非計也若欲收人徒盡保
城內勢又不能容墨子曰城有五不守而
食少人衆與無蓄積在外者居三焉如是
雖孫田翟釐之徒不能善其後矣爲今之
計莫若亟城江南使兩城並峙形勢相爲
應援則備禦之長策也或曰頃嘗繕舊城

人罷甚矣如新役何公曰吾能不勞民又
曰費當不貲將奚出公曰吾能不費民於
是條畫以屬督憲胡公公斥官帑佐城費
而民用之力輒以緡償之城成而民不知
勤賊亦覘知不敢近姚人曰是孰爲之非
少保公之賜乎夫受其賜而忘報非情也
於是諸生暨里中諸父老相率詣有司言
請得卜地龍山立祠肖公像以無忘衛民
之功祠成邑令徐候養相謂煒慈人也於
姚隣邑且辱公教爲深以書請爲記嗚呼

倭奴之禍滋蔓矣自兵興距今十餘年蹂
躪凡若干邑大都無城最先破有城不繕
繕而不完則又破如吾慈玩寇弗之城焚
劉鹵獲厥慘毒固烟戒也初公爲城議時
衆譁然以不便言者數十百公聞之不爲
動曰葵猶衛其足而吾不能爲邑里長久
畫可乎他非所卹也蓋公之識遠故防於
未然衆人之計近故暗於已著自古懷高
世之見者恒蒙非於衆負獨知之慮者多
見警於民豈惟公爲然哉乃今功成論定

食德者思報懷惠者歸仁豐堂儼像而尊
奉之視疇曩之謹梗如何也雖然茲豈公
之所欲哉顧姚人以公澤垂來裔功著金
湯吾儕世不能忘人人想見其風采而公
方秉鈞持衡揖讓人主之前袞舄還姚未
有期也邑之人士憑軾結勒北首燕跖者
得造階庭被容接而巖居野處之徒無由
瞻望威儀以躬致其感乃獲登斯堂而謁
公像豈不慰所思於萬一乎若公紆謨密
勿光輔中興而勲名殷燿追踪方召諸賢
則公之像又當丹青於麟閣之上煒也幸
從公後庶幾猶及見之

○覽輝樓記

余越山之鄙人也少結茅讀書四明山之
麓桑樞蓬戶董董焉朝夕至俛仰不能舒
嘗喟然太息曰余卑隘即終其身乎儻異
日抗迹青雲當作層樓闕八紘洒然滌茲
陋也廼今釋褐仕且十年矣未能歸山中
構一楹償疇曩心約也余固日鯁鯁然山
靈之負而同年中江莫君嘗為余道其家

覽輝樓云余曰君言樓乃懽然觸余懷也然謂樓爲覽輝者曷取焉君曰吾家東吳之海堧海上有九峯山者崑崎鬱巒映帶江湖蓋東南稱奇勝云中峯曰鳳凰山登階施靡蜿蜒起伏厥瑰麗視羣峯爲最吾結廬而棲適據茲山之首中葺小樓數楹隱約幽爽林壑縈迴吾日登斯樓而藏修息游嘯嘒吟咏於其間然竹梧分翠礪谷遺響吾每澄神接之未嘗不恍若鳳之飛鳴翹然噦然飄飄乎快聆覩也乃今牽迹

塵鞅蕙空鶴怨然而夢寐斯樓者固不斯夕寘焉近且託諸圖繪披閱寄懷而丹青形似莫抒玄棕子幸爲我記之余惟覽輝情景中江君旣已擷英探奧矣而顧陸之徒又復模寫勝槩表見天趣則是樓將與竹樓爭高黃鶴並傳屹屹然輝映今古也顧復假余記邪抑余聞之帝王握樞御極省閱萬微必有高明宏達之宇以宅心儲神游意昭曠然命名咸取諸物若古之五鳳丹鳳可徵睹也乃今中江君以南宮祠

部郎轡被文章藻黻邦禮偕英賢鵠立鳳樓未艾而顧睠睠焉海濱故樓之懷儻所謂廊廟而有江湖之思者非邪余嘗觀異物志云鳳爲靈瑞鳥善知時能以否泰爲隱見茲君遭際穆清振彩霄漢俟博德闕業萬物成理將以時消息與鳳而爲徒耶余又聞之古之聖儒宿學欲疏觀博照包括元化必建讀書藏書之樓以紬繹玄祕彙粹立索然精思悟妙乎達百靈當必有神物異鳥如朱雀之銜丹書青藜之授五行者降其樓君家東海密邇丹山而是樓又君著述之所卷帙之藏庸知鳳之不傳書而下邪余未能登君之樓以周覽鳳山之勝輒撫所聞出君之意外而記之

○吳江沈翁仰高記

吳江姑蘇之名邑也厥地據吳會之饒數具區帶三江浸洞庭震澤之波而靈巖禹祈諸山環拱東南蓋堪輿清淑之氣所淳穠焉故環奇詭偉之靈獻見莫可名物疏淪爲文物類淵澄玉潔英標秀舉而幽人

高士徃徃得其清逸肅遠之趣以超忽漭
澆之墟始余徒跣慕風韻之流而未能夷
攷其形槩也既丁酉捧鄉書北上乃得而
覽觀焉蓋嘗憇舟松陵探吊古幽勝蹟遂
步自雪灘登三高之祠瞻范大夫季鷹魯
望之像爲之徘徊而不忍去因重慨夫世
之人沒沒於功名爵祿間如翠鵠犀象之
惑於餌卽陷危賈禍而莫之自返而三君
子獨能履視勢榮翱翔寥廓蟬蛻於溷濁
之中矚然不蒙世溫蠖以滋其身可不謂

超忽荒齊億變情愔然入玄同之域哉已
乃復諦觀其形容則皆風神脩脩玉立塵
表而挹其冲虛恬泊之思若將軒舉霞外
不可形執竊意其清修高潔之風當必鼓
舞羣動而吳之耆英逸老居三君子隱迹
知幾之地豈無漸淪被服景高行仰休光
以立名於今日者乎於是詢其祠之旁而
遺昨故老咸噴噴稱沈翁沈翁云然時雖
樂聞翁名而未暇遑訪求其行事至明年
爲戊戌乃與翁之子子由同舉進士於是

子由爲余稱說翁滋益詳第翁之操行固
卓越不羣然儕諸三君子之遺似不可同
日語獨其心之所嚮往則扁舟蓴鱸筆床
詩艇昕夕與游息而不違焉余乃知古今
人曠世而相感者其動履恒人人殊至其
意向高明襟度融脫而冥會神交於千載
之上下則較然相等埒不然長卿易名以
慕蘭而子虛大人詞賦宏麗逸乎歸璧擊
缶之風漢人之郊敦也以折巾然隱不違
親貞不絕俗西京罕能步林宗之武者則

夫沈翁之仰高庸可考求迹合而比之哉
翁名某字某仰高其別號也子由名某今
自比部尚書即出守會稽云

○句容縣建京兆行府碑記

今留都應天府古金陵建康宅也我

國家鴻業肇基追軼豐鎬蓋根本重地云句
容治府東九十里四方趨留都輻輳並至
句容寔要其道邑止公署二區然監司及
過賓之停車蓋者無虛夕有司以供館不
給日閔閔然憂不賓焉嘉靖癸丑春三月

邑令缺撫按廉應天判汪君材賢著聲檄
署邑政君視事甫踰月即修墜興廢廼百
弛稍稍然振矣未幾巡按某公行部蒞邑
中府僚佐及郡邑之良咸以職務從公至
至僦民舍而居汪君新攝邑倥偬意撫然
靡遑處也廼太息曰郡僚諸令長之戾止
凡以出政臨民也顧今囂馬就民間處是
寧能禁戢奸僞嚴上下出入之防而辨等
威耶相度建署所宜得東嶽廢廟舊址廓
如曰是可因而革之者也繼得興教寺之

廢材木石委峙曰是可葺而新之者也退
而綜核簿書劑量賦贖得錢若干緡金若
千兩曰是可聚材而鳩功者也乃條列利
弊規畫初終以狀上諸當道具報允操江
蔡公督學趙公咸加贊賞巡撫彭公尤樂
意主成巡按閻公特獎之曰官民不擾共
樂趨事可以觀政矣君於是毅然樂任之
召典史袁鉞曰汝材汝爲我董茲役於是
集匠飭材程能計日約費節力作勤黜惰
大持小維工備奮事經始于六月既望訖

工於九月朔其工恪然其成裕然人不及
計力不及議而新署翬奕崇構具瞻矣其
制重門堂宇鱗次吏皂有廡燕遊有所庖
湏周垣翼如繚如他日縉紳冠蓋以事至
茲邑即署而居之發政令而嚴禁防別等
威而時出入非所謂賓至如歸無寧菑患
者耶署成榜之曰京兆行府且伐石樹碑
紀其事以垂諸永久走使幣屬記於余余
嘗博觀往牒自靈臺子來而降今之動衆
興工役者仁人君子鮮嘉樂而與之何者
懼其傷財而病民力也今汪君酌時揣物
舉維其中地取諸不田材取諸不費用取
諸不賦行府鼎勅官民兩忘即古奚斯所
作史克所頌庶幾遺美矣矧諸當道會獎
之余復載其積于貞珉而紀之則茲役也
豈不爲仁人君子之所公是耶汪君某貴
溪人由鄉進士上第三今名邑績轉今官
其施為政事余聞其良積矣而典史鉉為
余宗弟將君意甚懇故為之記

○葛氏祠堂碑記

余慈洋南葛氏世以儒術文行傳其家宋南渡時有千一府君者自丹陽徙於慈故府君遂爲葛始祖云府君厚積長發乃其後英賢代毓引揚休明顧多好古耽墳藉潔修淵博之士宋進士二人

國朝鄉進士七人貢舉三人雖位不致顯榮然皆擄英擻茂闡繹藝材固漢申伏韓毛大小戴夏侯之疇匹也乃慈人中稱經生學士褒然詩書禮義之宗葛氏爲最著矣余嘗誦慕其先烈而今甌寧今文溪先生

則予乃雅承而習觀其學行焉先生博家學之精沉澂六籍洽聞鴻藻軼然振前修之緒嘉靖壬午以齊魯詩舉于鄉已廼仕閩之甌寧今先生治甌有異績三載將持最報天官既而幡然思曰至人達生泥而不渣吾胡忍以矚然之身囿心滋垢哉遂決棄章組歸臥於赤水之厓稍葺先人舊田廬蒔花種藥獨成其意遽然靡所營也然視橐中有俸餘金因斥若干金構居之東南地一區作祠宇以祀其先人祀自千一

府君下至丹厓博士共二十人堂寢翬施
庖滷鱗次遺書有藏祭器有室樹門表枋
枚渠靚深翼翼乎邑中稱希構矣祠成先
生既為文鐫石以飭後人而復屬余記其
事余觀慈之縉紳顯家無慮什百然多藏
主祭於家而特祠祀其先者僅什之一二
先生仕而得俸靡暇遑田宅計而首創先
祠以追孝養此其識見不超然絕倫埒耶
余聞德厚流光道化自然之符也葛之先
哲人俾積淵穡既篤生明胤如先生隆孝
思以崇其本矣自茲而秩祜申錫施及雲
來後先生而奮熙者庸不世守先祠又恢
其所未備者哉夫廟以觀德禮以知政先
生固遺榮彌綸畫卷經綸而立祠以行典
禮奕奕然振起頽俗藉令究其所學位之
鼎鈞將不明備禮樂潤色鴻業以持叔季
之衰耶先生文著之碑者謹嚴諄切詞義
雅馴子姓讀之無不凜然畏竦然敬服者
余重違先生命乃復贅之以詞云

○桂氏復先祠碑記

余慈之桂氏蓋徙自信之貴溪云慈之遷
祖寔宋大理寺評寺可昇而祠之助則寶
章閣學士萬榮初書院於湯山之麓用以
聚徒講學而先靈亦茲妥焉侍郎張文靖
公題曰石坡書院即其地也書院更宋元
久頽弗葺迄弘治壬子侍御史鎬乃徙建
于闕湖之陰榱楹栗如門垣翼如堂宇靚
如視湯山初構尤傑爰迺遷祖而上為唐
柱國司空忠貞公卿下則宋翰林院待制
公之望學士萬榮

明晉國右傳靖節公彥良咸肖像祠之而族之
貴顯隱德及有節孝而旌者列兩序歲時
獻享畢因敘拜合食而宗人之長者得申
家訓以勵儆其子姓侍御君之所紹遺儻
所謂孝思錫類者非耶既侍御君沒子元
思墜宗弗嗣正德甲戌什碑撤像携家居
祠中而以其餘賃他姓已嘉靖甲午將盡
鬻於勢家未果售而今銅仁守思齋伯諒
適以龍泉令考績歸姪汝占君槐亦以省
覲至宗人冕舉元思事歷歷為司戶君言

汝占君就思齋謀乃思齋感然謂汝占君
曰余宗侍御建祠以享先人厥子顧皆窳
若此今恢乎復之以公諸族非吾與若之
責乎即慨然捐俸金伯兩司戶君捐租十
八石衆族佐財有差贖祠而新之宗長某
及思齋之兄某寔董厥工云撤故易腐起圯
植頽檐宇聖丹廟貌有赫枚枚渠渠膽之
巋如而石坡之舊不堙然就廢墜也祠成
其宗人倬紀諸碑詳矣乃更言乞言於余
余惟祠者事也仁人孝子所以事死如事
生事亡如事存而殫吾心性之良也乃今
思齋先生汝占君光復故祠此豈有矯飾
情貌哉亦惟復吾性之仁孝焉爾夫尊祖
成親之謂孝而仁則本躰之全也此心在
我融液充周而敦族敘倫親民育物之化
固熙然浹粲然陳訢訢然相孚昭也世之
人汨沒仁孝之良而罔知復其初者何可
勝道故有高車駟馬功名著於春秋丘金
積王者豈尠哉然至于其族屬則踈矣以
千金飾裘馬而族人則衣懸鶉出於昆弟

筭無遺銖已及聚朋輩則晏遊日譌舞見
尊官豪貴人足帖帖如有緣至見族長輩或
不下車也矧能復廢祠以仁祖捐金穀以
合宗人哉余故於思齋先生叔姪所表創
謂庶幾古仁孝之遺也若其贍祠綜理之
周倬皆記之余不復贅云

○姚氏弘本堂記

余慈稱貴顯望族世文獻輝映者以什數
而姚為著貴顯家構而居旅楹浮柱森錯
相望者以什數而姚之植本堂為著然植

本之名義及世系官職之詳乃師文正記
之矣顧姚之先植固而發深厥子孫日益
蕃滋而科第之殷殷起者日益茂乃掬粟
布散各闢堂以居而堂之名不忘植本之
初扞指逼意惟見可觀矣南京部郎明川
君以東泉司馬公之從子明山學士之從
昆弟振跡藝林策竒青漢舉乙未進士歷
官省署蒸蒸然廊廟之才君少壯負竒偉
每思增烈前宗佑啓來世嘉靖庚子得隙
地於植本堂左將飭材鳩工作堂室為光

裕計已乃羈栖宦途竟甲辰嬰疾以遊不
果酬願考成其堂既君伯子挺偕其弟樾
咸英敏瑰瓌以文學世家遂能踔遠紹休
即其地而堂焉爽愷閎奧輪視植本之構
可謂比材而傑矣堂之額曰弘本取擴大
初堂之義循明川君之遺命也慈之縉紳
諸先生賀二子茂承先德屬予記之以垂
光永永焉余惟植本之稱自其先君榛命
之而吾人心性之學宋諸儒究極其淵闕
昏矣姚隱君當宋之季世於儒先諸論必

蓋見而與聞無疑也即其所稱說儻所謂
立本者非耶夫性根於心命之曰中是天
下之大本也其全體大用渾淪停涵而天
地人物之紀胥由此出古昔聖賢冥觀默
會洞察其本原是以植之則靜深弘之則
淵博亘之則悠遠發之則高明推而大之
則錯陳紛布變化彌綸莫非其功用所効
著所謂至遠無垠深入裨海其詞約而旨
博者其幾渺而通無方者舍茲本曷歸耶
姚隱君采之以名堂其云來也作求之而

不墜靈根湛一通極玄寓則履淳毓粹載
穆含穌得不以廣居昭之乎躰順頤貞葆
光定宇得不以安宅佚之乎率性成身行
法章采得不以正路迪之乎道成藝立擻
茂蜚英得不以尊爵貴之乎隱君荆馬後
人述而弘焉則天下之大本立矣樞樾伯
仲非是之弘何以哉若徒眩詞章侵簪紱
壯麗房室以襲前人之粗迹乃吾之本已
湮沒矣何異于繫瓠以瞭揖耶堂凡若干
楹後爲室舍庖湍諸構皆鱗次可覽觀經

始于丙午春三月落成於戊申秋七月厥
上蓋三閱歲云

表文榮公文集卷六終

表文榮公文集卷之七

○瑞穀頌

嘉靖三十有五年歲在丙辰秋七月之望維
時萬寶際登

聖誕伊邇

帝苑籍田產瑞穀一莖雙穗者九十五本臣竊
觀古圖緯傳紀中所載天地符瑞累數千
百種若卿雲甘露醴泉紫芝白兔朱鴈之
屬雖皆含宇宙之精彰太平之慶昭帝王
永命之符然而上祥元瑞富國養民有禪

於聖人仁壽之化則惟瑞穀爲稱首焉臣
常攷諸瑞應圖云嘉禾五穀之長王者德
茂則生神農時雀啣九穗朱禾墜地堯時
嘉禾孳於畝而異本同穎同本異秀三穎
同秀則生於三代盛時乃知神禾元稷萬
瑞之宗是必待至神上聖配

天事

帝之君然後產於天田以顯示靈秘茂着化功
仰惟

皇上 德參混元含真邃古超三軌五俯視百

王

聖化神功光境宇宙天符地禎有司奏獻無虛
歲而惟茲瑞穀則生於

帝畝協於聖誕且一莖雙穗體備三才而九十
五本則

皇上九五當陽植本基壽愈久而不盈之兆也
所謂太平有道之符四海豐登之象

皇上萬年仁壽之麻不於此可徵睹耶謹撰瑞
穀頌一篇以續古人萃黍之嘒云頌曰
天啓明祚篤生聖人應圖御曆志氣如神

精疑淵穆道契玄真昭事

上帝敬恭明禋體乾立極三十五春化隆軒昊

治俯虞殷

睿齡五秩歲惟丙辰七月既望

聖誕將臻倬彼

帝籍原隰昫昫靈雨灌溉膏露漸淪神峻培擁

厚粹含醇挺生瑞穀顯奇効珍龍枝屈曲

瓊粒維馨一莖雙穗出類超倫九十五本

穎粟具陳

帝握其數端倪孰甄靜思厥緒瑞應

紫宸三才備象九五無垠

聖壽永永五嶽嶙峋紫芝三秀曄然以新昌若

茲穀享帝享親豈無續連產於戶闥曷若

茲穀福

君祚民亦有華平靈枝蓁蓁曷若茲穀壽

國壽身穆穆

聖皇手握化鈞闔闢二炁運幹儀璘祈晴日暄

禱雨澤均調和六合庶彙勻勻獨茲瑞穀

允徵德純協于

慶旦尤證壽因覩此奇瑞祈祝懽忻載拜稽

首殫潛忱恂

○玉芝頌

臣聞天心物理妙合無間

帝德休徵其應如答幾兆着明靡德而誣已然
諸物皆能薦祥而神草之生獨異殊方悉
來敵瑞而帝居之瑞尤奇恭惟

皇上

仁孝格天

悠久成物是故靈貺輻輳卉木効禎茲惟首
秋

聖誕伊邇而

宸居之東酉位有芝生焉其生皜潔如切玉如
截肪輪困擘敷鮮潤瑩美舒張若萃蓋挺
立若仙掌臣按神農氏之論有曰山川雲
雨五行四時陰陽晝夜之精以生五色神
芝皆爲

聖王庥祥然攷傳記中所載類產於明山靈岫
人不常覩取而獻之皆得稱瑞至於殿庭
門廡之間其爲瑞應滋異乃今產於
皇上宮居崇峻密邃之地則天和獨厚地寶露

形枝幹莖葩盡在目中誠千載之希覯萬
壽之禎符也夫甘泉九莖漢宮作哥玉殿
三秀唐臣賦詩矧此玉朶之應休徵顯赫
震耀無前豈彼漢唐可彷彿其萬一哉雖
鋪張奇瑞有慚鴻筆而忭蹈忻躍之私自
不能已敢忘蕪陋恭撰玉芝頌一篇以獻
用附於古詞臣之末云頌曰

皇明八葉挺生

聖人中興赫奕化理咸新百靈効順庶彙呈珍
惟茲芝瑞蕃毓輪囷臣工樂輸攸同萬國
露浥九莖霞凝五色赤象龍麟青輝文德
玄渥滋培無遠弗格乃茲秋孟天開壽圖
物寶薦嘉瑞應畢書煌煌芝朶妙現尤殊
無根無種倏產

帝居如壁之潤如蓋之舒福田爲基景雲爲覆
定名玉芝卓冠三秀天地不愛特畀我

后粵稽在昔孰出其右蒼山之北海穴之東似
龍似馬成闕成宮芳流徃牒曷訪其蹤豈
若此芝曄敷禁中漢哥甘泉唐賦玉殿金
匱昭榮丹靣示炫斯今之產振古罕見伊

誰貽之淵哉昊眷於惟茲眷允懌

皇情古籍有云服之長生不煩採掇不假繪形孰擁其本孰相其成分種自天託根自地玄德所感不求而至擢穎彤闈揚芬螭陛莖引岳珍朶來霄見迥邁前聞信爲上瑞微臣所躍獻此頌章何以頌之萬壽無疆家邦洽慶宗社延康德涵草木仁洽飛翔道超堯舜億載垂裳

○禾祥頌

臣聞上聖之君御運乘乾履中建極則

皇天眷祐必錫之麻徵以表見其明貺故道合渾淪者其應神德叅造化者其祥大功濟寰區者其瑞蕃壽齊宇宙者其兆顯自昔載記所陳粲然可觀矣若夫一德孚契神寶沓呈乾符坤珍疊至紛出超圖浮牒比隆遠初則惟我

皇上得天爲獨厚焉頃年以來精誠照格至和薰蒸群生阜育蕃祉發揮山箴澤秘之英罔不效竒獻羨以宣大順大化之光彰萬壽無疆之慶乃者孟秋良月苑籍薦豐峻

人載獲神禾現珠一本三穗者一雙穗者
五十有五此誠稀世之嘉祥不恒有之上
瑞也臣伏思之一爲太極三爲三才五十
五爲天地之全數天之降瑞實以我

皇上得一函三紹中闡澤握圭治世與天地相
爲悠久之象也故知啓聖者天合符者聖
聖與天合則幾先之所柄象數之所成真
所謂先天而天弗違後天而奉天時者矣
昔周人作謠以頌君必鋪張帝眷稱述天
休其天保則曰俾爾戩穀馨馨無不宜在嘉

樂則曰保佑命之自天申之臣觀

皇上明德馨香帝心嘉悅保綏申錫久而益勤
幸覩殊禎懽悰百倍敬獻蕪詞一章頌曰
穆穆

聖皇樞陰秉陽建中握紀寶運彌昌昭事
上帝厥德芬芳

帝心愉懌保之佑之申錫匪懈恩斯勤斯薦和
儲祉符瑞離離其瑞維何層見疊至天祥
地禎畢來獻異海若山祗咸貢美利隆隆
玉峪良金自溢翼翼瓊宮靈芝自出皜皜

白鹿馴於禁室茲歲戊午良月維申田峻
奏獲萬寶登新

帝降嘉穀罕覩之珍一莖挺秀萃穗三岐亦有
穗五五呈奇臣竊思之瑞合昌奇

我

皇抱一參爲三才天地全數河圖昭回穀乎豈
偶然哉其穀維何厥品匪夷龍枝屈曲瓊
粒蕃滋同穎異秀曠古所希寶誕伊邇預
兆萬齡色交卿霽光近壽星天田煥彩神
庾升馨導於天庖王祿恒裕惠於仙寰民

食維富薦於郊廟明粢孔具美哉期瑞膏
露宵溥曷以灌之甘泉涓涓曷以覆之油
雲團團天地不愛昇之神

聖妙證玄功長生永命小臣作頌寔慚鴻
藻其詩匪石其風匪好敬祝

明皇萬年天保

○白鹿頌

恭惟

皇上乘至德握靈圖受

命穆清履中建極廓參兩之神化冠三五

之卓踪玄恩湛穢和氣薰蒸黎庶洽熙昆
蟲凱澤是以天降殊祥地呈嘉瑞物効禎
符惟茲孟夏之吉浙直督臣得白鹿於浙
東之舟山恭獻

闕下馴性竒姿素毳皜質皎若霜明炯如玉
立臣民快覩欣躍鼓舞罔不謂天心爲祐
皇上錫茲萬壽福祿之兆也臣當攷運斗樞曰
瑤光散而爲鹿瑞應圖曰鹿者純靈之獸
帝王道純明惠及下則白鹿見又抱朴子曰
鹿壽千歲滿五百歲而白淮南子曰黃帝

御天下而白鹿至披藝觀之迺知茲瑞不
恒見於世必神聖御宇道合真元天始命
此靈物應時而出以着麻徵也昔白麟朱
雁漢臣侈其美蒼烏赤雀唐人擲其華矧
今竒瑞遠邁百王可不宣之頌述昭示將
來鋪鴻庥彰懿烈以對揚上帝之明賜哉
敢忘愚陋恭撰頌一篇以獻頌曰
於赫

皇明流慶發祥顯謨承烈奕葉延昌篤生
神聖駿烈彌光重華燦燦超虞邁唐恭嘿

凝命仁育四方惟玄惟穆是謂天道

聖王乘乾合符

帝昊昊眷寵綏以佑以保保佑申之隆禧
穰浩午夏維吉瑞鹿來禎彰我薦福純嘏
之徵弗福兆慶疇匹疇京祿瑞伊集後先
迭呈東瀛之域上應南極赤水云云丹山
奕奕儲禎藩和列仙攸宅瑤光孕精山祗
表德真符應期王麋游息翳彼麋兮皜皜
純質潔毳凝霜素毫皎日色瑩楚珩光浮
京璧性含馴和慧靈解擇遠彼海嶠來捧

仙蹕仙蹕曷從曰惟帝咨咨爾南極天子
是毗叅駕龍媒賁臨王墀爰撫爰玩

皇情載怡粵若文囿濯濯呦呦曷若紫禁埒勝
蓬丘載飲載茹瑤華玉湫舞率廷獸鳴協
琳球有攸其儀美哉

帝庥其庥云何百祿是道百祿之道眉壽之祺
引齡千紀五百素姿禔禔壽考綿綿景祚
海寓肅清民物康阜四夷賓王瓊圖鞏固
小臣作頌尚俟韶護

○甘露頌

恭惟

皇上紹天御曆應運當陽至仁大孝事
帝尊

親德馨孚格於神明和氣薰蒸於海寓四十一年以來乾符坤祉溢牒充圖不可殫述焉
已乃茲歲壬戌十一月長至今節

皇上舉陽典於大壇安

親寓於象一

聖誠默契恍接音容而是日天降甘露於
顯陵之松上其白如脂其甘如飴聚玉聯

珠信曠古之所創觀而罕覲者守土之臣
採掇馳獻於禁苑

皇上以大祥貞絕天親所貽乃薦告郊廟對揚
玄庥而小大臣工欣欣然咸謂

聖德感通天垂渥眷顯著仁孝之應昭彰萬壽
福祿之徵夏如此也臣嘗攷之傳曰君治
政則軒轅之精散爲甘露又曰聖王之德
上及太清下及太寧中及萬靈則甘露下
又曰王者德至於天則甘露降松柏由此
觀之

上帝儲珍蓄寶必待

神聖不世出之君然後協其時擇其地而特畀之臣伏覩

皇上體道純心秉誠緝敬夙宵對越動靜弗違是至仁以事帝矣知化窮神顯謨承烈鴻名鉅典備物思成是大孝以尊親矣夫仁以事帝孝以尊親則

皇上之明德妙合於帝而二親之神功幽替於天是以怵喜懽愛流通無間而其露降焉且其降也會於日至之熙辰其時若或

詠而良也溥於顯陵之寶壤其地若或選而勝也蓋日當南至一陽始生我

皇上迎日推策履慶踐長而神澤靈膏薦和効美臣有以仰窺

上帝之心蓋保錫億萬年無疆之筭也夫崑崙皎雪曾侈盛於堯年東極吉雲亦稱竒於漢史矧茲露瑞載呈於旺地而兩見於

昌朝固有超軼陶唐而下陋漢世者可無紀述以揚其芬哉謹撰頌一章頓首上獻頌曰於昭我

皇撫運中興握圖御曆德及清寧至仁大孝三
五莫京尊親事帝祇敬精誠仁孝之
極上通神明帝歆親悅和氣薰蒸靈祝滋
至大祥聿呈厥祥伊何保露青靈騰茲寶
露軒轅儲精陰陽訢合天地釀成含滋委
素連珠綴星瀼瀼湛湛浥浥盈盈其白如
脂其味如飴既鬯而芳亦飶其馨神漿可
挹天酒是名協時之良一陽始亨大壇秩
紀明德方升恭遷神座二聖妥靈不先
不後適與時并擇地之勝曰維顯靈二

聖壽域清淑攸凝豐芑結潤山川發英溥
茲松葉光彩晶熒守臣忻獲采貢闕庭
瓊爵是注璃噐是盛乃獻

上帝乃薦宗枋小臣作頌爰播庥聲祝皇萬壽
以莫不增

○賀聖節表

伏以

皇天昭特眷開貞元妙合之昌期

聖主握靈圖會曆象希逢之期數際中秋而臻
誕節適同日而巡景躔應神聖永命之符洽臣

庶齊天之祝恭惟

皇上心涵太始道貫重玄以日月為光以雨露
為澤以雷霆為威二儀總歸於闔闢以陰
陽為瑞以四時為柄以星辰為紀萬化成
屬於綱維敬受人時順五行而調六氣欽
若天道齊七政以叙九功甘雨屢祈而應
祈靈貺昭孚於夏序太陽當食而不食麻
祥迭瑰於朔辰信至德卓冠於無倫斯玄
機聿彰於曠世茲者律諧南呂瑞啓上旬
屆震夙之期協休徵之旦歲在酉而月亦

在酉候正金衡誕輪丁而度亦輪丁光聯
玉緯電虹煥彩清秋耀毓

聖之祥木火通明

紫極注當生之照雖巧曆莫窮其秘實

上帝默運其樞自生民以來未有妙於今日惟
聖人首出獨能合乎先天是造化千百年
之禎久儲而始發我

皇上億萬載之紀不占而有孚矣臣等叨列九
曹懽逢二慶仰誕神之創見知遐齡配
二極以長存瞻景度之非常卜聖筭後三

光而難老集衣冠於萬國共稱北斗之觴
率拜舞於千官永獻南山之頌伏願珮珞
符而久視

御玉曆以常安格太清奠太寧不顯太平於
有象欽萬福享萬祿彌昌萬壽於無疆

○賀萬壽表

嘉靖四十一年八月初十日恭遇

萬壽聖節臣等誠懼誠忤稽首頓首稱

賀者伏以

皇穹申大眷三秋開毓

聖之祥

紫極履長生萬國仰齊

天之壽萃珍符而荐祉會寶曆以昭奇慶洽臣

民懽均華裔恭惟

皇上應圖首出乘運中興

聖德神功軼三皇而超五帝

文謨武烈揚

三祖而觀

七宗禮樂明備於兩間車書混同於一統北
殄南殲自西自東而寧謐四方臻泰定之

麻雨陽時若日寒日燠以和調萬寶奏豐
登之積巍巍蕩蕩恢至治以無前赫赫明
明闡太平於有象茲者金衢正序王緯騰
光屆

震夙之昌期電繞虹流而絢彩朗秋澄之灝氣
星輝雲潤以敷華堯堦舒十葉之仙萱徵
仙齡而愈茂

帝畝秀三岐之瑞穀迎瑞節以預呈初度嘉臨
諸禎彙集協兆熙神之慶更逢巧曆之旋
太歲在壬

寶誕與年干而璧合中秋輪卯瑤躔接生日以
珠聯灼

玄昊之靈機契泰元之神策即今四十一載
福如川至而日升自茲千萬億年筭並天
長而地久臣等叩塵輔弼夙荷生成持北
斗之觴望

紫宸而稱獻誦南山之雅贍

皇極以揄揚伏願祚鞏乾坤 齡齊箕翼維

天子命維 天子使臣無忠良永郊

尊親之戴祝

聖人壽祝聖人富民物康阜益綿昌熾之圖
○賀冬至表

嘉靖四十年十一月初六日恭遇

冬至令節臣等誠忙誠懼稽首頓首稱
賀者伏以

皇穹御運鴻鈞斡六氣之和

聖主當陽鳳曆肇一元之祚喜乾坤之轉泰觀
海宇以回春瑞藹

紫宸百辟衣冠會集祥開黃道萬方玉帛來同
慶洽 熙朝懽騰 令節恭遇我

皇上道涵太始德合重玄運真機於混闢之先
功深不露調祕籥於穆清之上化妙難名
受洪範以序九疇建用

皇極察璿璣而齊七政敬受人時上以亮乎天
工下以熙于歲績霑恩滋產玄育物阜民
康恢武畧顯

神威氛消虜靖當四海寢兵之候正兩階
肆樂之辰六管飛灰驗陽生于緹室八風
從律辨氣至於黃鍾會日躔月躔星躔光
聯七躍開天統地統人統序正三才淑景

漸長一線綿延於萬禩卿雲密擁五文締
結於千禧實號昌期况遭盛際臣等位躋
九列總叨對育之仁官備四時莫贊燮調
之造方効漢廷之祝祇深嵩岳之呼伏願
寶筭崇增 瑤圖鞏固乾以旋坤以轉萬年
彌熾彌昌山之峙海之流四海永康永泰
臣等無任瞻

天仰

聖忻躍之至謹具本奏

賀以

聞

○謝入閣表

嘉靖四十年十一月初七日准吏部咨欽
奉

勅吏部大宗伯煒加太子太保戶部尚書兼武
英殿大學士在內閣輔治如勅奉行欽此
隨該臣具疏辭免奉

聖旨卿性資敬慎才識精敏宜承簡命以輔朕
治不允所辭吏部知道欽此欽遵除報名
廷謝外臣感激非常

聖恩謹稽首頓首稱

謝者伏以

龍勅渙頒忽拜九天之特命

鴻恩鼎賚荐膺三錫之殊階慶遭遇以無前忝

寵榮而莫冀銘心切感撫已增慚竊念家

世孤寒性資愚撲謬登甲第又塵侍從之

班屢玷清華罔效涓埃之報幸叨

渥眷轉遷無俟於僉推過沐

淵慈躋拔每由於獨斷以講官而擢供

內撰由卿貳而晉位秩宗自知涯分之極

逾豈意

眷私之無已乃茲重寄濫昇庸流黃扉叅機

務之殷光聯台斗

紫閣贊謀猷之密職預約鈞衡官保加銜名亞三

孤之貴地卿改秩官聯八座之尊更邁等

倫超兼殿學一朝

三命淋漓捧

御墨之新九月再遷峻絕駭朝紳之望即堯

后明揚之典猶有待於咨諏而商宗爰立

之期尚亦煩乎夢卜豈如今日迥軼前聞

茲蓋伏遇

皇上緯武經文運神謨而屈群策亟虛致靜炳
睿照以燭先機

日月並明淑慝不淆於旌別乾坤精度巨
纖總屬於甄陶遂令樗櫟之材亦備棟榱
之用始終造就功逾覆載以難名先後曲
成德重鞠生而莫報此臣所以戢銜鑄鏤
而求矢弗諉者也埤敢不忠誠逾曷奉
直贊若對神明敬慎益持事

君父如臨

上帝庶下不媿生平之學而上不負特達之知

伏願

聖化雍熙

宸齡綿衍頌日升歌天保御王曆以長春內順
治外威嚴奠金甌而孔固臣無任感激
仰戴

天恩之至謹具本奏

謝以

聞

○冬至賀表

伏以

皇天開泰運一陽來復於黃宮

聖主體乾元萬壽長生於紫極茂對昌辰之慶
聿崇亞歲之儀民物咸熙臣工胥懌

恭惟

皇上心涵太始德契重玄武緯文經闔闢妙乾
坤之用仁育義正動靜見天地之心

握軒筴而撫五辰察舜衡而齊七政化調
玉燭圓六合以同春誠格璇穹叶三靈而
薦祉茲者節逢長至道應太來陽明肇啓

於

熙朝淑景漸舒於化國月臨子半璿璣回玉
斗之柄日會丁傍珠璧合瑤垣之瑞黃鍾
律應緹室葭浮圭影寢增徵日升之景祚
水泉初動溢川至之殊禎

神威播而餘稜全消魯史之書雲有賴

皇極崇而大義允赫周家之懸象維新天庥順
序以駢臻

君道隨陽而彌長

九重欽福拱四十一載之太平三至呈祥衍

百千萬年之浩筭臣等功慚調燮

寵荷甄陶觀日官底日之期首鵷行而被照
祝

天子齊天之壽瞻螭陛以輸忱伏願

昊眷申綏玄釐滋至

天之統地之統人之統御鳳曆於無疆
壽之符福之符祿之符撫鴻圖於無末

○長至表

伏以

祥開獻歲三辰協泰運之昌

律動初陽萬國際乾元之會頒韶年於鳳
紀申景命於

鴻圖海宇同春神人胥懌恭惟

皇上德合太初

道涵元始握璿璣而授曆調玉燭以和民
鼓舞變通續

二祖七宗之烈彌綸叅贊兼三皇五帝之庥
茲逢歲序之首臨式值芳辰之肇命福隨
春至道與時亨履三十載之太平至治益
隆於熙皞啓億萬年之祚胤膚功丕着於

休明化日舒長淑景覆千官之彩條風蕩
漾神飈清四裔之氛斗轉蒼龍識旋樞於
紫極天開黃道知凝命於青陽觀者度之
維新仰

一人之歛福臣等愧章縫之末品濫待從之清
班豫大豐亨長荷履端之慶昭明融朗已
觀有俶之祥椒頌栢銘欲獻春歌於萬壽
槐煙柳色忻承御氣於千門久依舜日之
重華莫裨堯裳於寸縷敢不欽象魏始和
之法吟咏昇平扶王葭初布之陽協恭俊

又伏願

對時育物握紀當乾萬物翔舞於太和春回
寒谷九月涵濡乎茂澤化麗中天日升月
恒引億萬斯年之壽星輝雲潤開數千百
順之祥

○賀南服奏捷表

伏以

中興開泰運

九重震捷伐之威南服奏膚功萬國仰昇平
之化駿烈允昭於

聖武鴻圖胥戴於

皇猷普率均懽臣民協慶恭惟我

皇上體乾剛而御極秉離照以當陽

握聖人治世之符河清海晏廓真主安民之

勇雷屬風飛凡寄象鞅譯之區罔不獻琛

而納贄矧声名文物之地敢不慕義以懷

仁願茲藪伏之逋妄作草邪之宄蛙延數

郡未消渤海之兵鼠竄連年尚弄潢池之

警肆

宸衷一怒丕揚閩外之雄師而

睿筭萬全獨運禁中之秘畧伏

帝穹之威命默奪奸謀播玄府之符潛驅逆

沴星旗遙指已寒群醜之心一譯初行端

繫渠兇之首蠢爾跳梁於越一候焉執馘

於崇朝赫矣天誅真由神助一是苗民之

逆命不啻三旬今茲周室之成功正逢六

月馳捷音於輦轂動喜色於山川殆神靈

拱扈於神州汛掃妖氛之氣而

帝佑昭扶於

帝德蕩開梗厲之階國步方隆合天地神明而

胥保

皇師於鑠軼唐虞軒昊以無前城近代之殊勲
而

熙朝之勝事也臣等叨居密署莫攄帷幄之
籌快覩羽書擬續鏡歌之響感鴻私以倍
幸祇虎拜以揚休願

王祚彌昌金甌孔固歌七政偃五兵萬載享
永清之化撫四夷大一統九圍鞏全盛之

圖

○賀嘉禾祥表

伏以

聖畝呈奇萬國啓豐登之慶神禾薦瑞
九重徵祿壽之符荷

天貺之特隆昭

帝恩之率育臣民胥懌寰宇同懽恭惟

皇上 道格

穹祇功參

覆載元氣元形之妙籥陽陰和而風雨時運
資生資始之真機草木茂而勾萌達園八
埏於普泰陶庶類於咸熙是以值物知仁

禎圖應

聖維珍禾爲五穀之長德懋則生而嘉稷實
萬寶之精歲康斯現茲者候當秋孟祥効
穡人珠露曉凝秀發金莖之色卿雲書覆
醲滋玉粒之馨恭和夙釀於黃輿美種遂
彰於玄化維兩岐之擢穎數正協於兩儀
粵三穗之揚芒象復呈於三極香分仙黍
在

內苑爲尤竒光近

帝星接

昌辰爲愈妙乘時匪偶得地斯靈允叶大有
之占丕顯太平之象獻之

祖廟實有苾而有芬應在

聖躬必多富而多壽盈箱積廩昌萬方王食之
儲擊壤歌衢祝

五位瑤齡之永誠國阜物民之上瑞而天時
地利之庥徵也煒等夙荷栽培忻逢明盛
仰百祿之是總載賡商頌之音祈萬壽以
無彊擬效周臣之詠伏願

皇圖孔固邦本益寧

廣聖皇之田義種仁耕九有樂雍熙之化
備天下之養財充用足億年履福祿之康
○皇極殿成賀表

伏以

皇穹開泰昭

駿命於維新

聖主當乾闢

鴻圖於再造屬五百載中興之

運奠億萬年孔固之基寰宇具瞻臣民胥

慶恭惟

皇上體

天御極紹

祖宅中成樞陰機陽之能而幹旋元會達窮神
知化之妙而繼述丕謨混六合以爲家配
二儀而正位茲荷

天心眷愛示革舊之昌期乃承

帝命經營建鼎新之偉制百靈嚮應群材岳貢
以川輸兆姓懽趨庶役雲從而雷動始日
合少日完富日美煥

九重壯麗之規跂斯翼鳥斯革翬斯飛聳萬

國朝宗之望

大業增隆於

祖武洪名濬發於

宸衷特崇

皇極之稱首揭

君臨之地次建中於後殿式彰宰化之原列歸
會於傍扉顯示尊王之路閣則東文而西
武義闡昭成門則左弘而右宣光揚正治
上通

紫極薄日月而切星辰下亘黃輿峙華嵩而縈
河海神扶

天保巨工聿就於三年夷戴華尊
景祚永垂於萬世此蓋

皇上

德優叅兩兼明聖而盡倫是以功冠五三合
創守而盡制也煒等幸塵密勿叨直

禁廬仰廣厦之萬間併懔有賴瞻

明堂之千仞柱石何功謹稽首以颺言擬濡
毫而獻頌伏願

瑤圖益鞏

玉眷彌昌培壽基培福基培祿基茂膺壽福
祿之禧常臨萬世立

天極立地極立人極永爲

天地人之主久視仙寰

○賀甘露表

伏以

璠穹垂祐昭至仁事

帝之誠 寶地凝祥顯

大孝尊 親之應際一陽而妙合徵

萬壽以長生普率騰懽臣民協慶恭惟

皇上 心涵太素 道契混元 膺駿命以當

乾紹鴻圖而履泰以日星爲紀三光全而
斗極明以陰陽爲端六氣調而雨暘若天

作昌地作時人作樂

神功蕩蕩以巍巍

君和德臣和朝民和野

聖治熙熙而皞皞馨德旁通於十極禎符迭
薦於三靈茲者陽氣方昇天心未復典舉

大壇而饗

帝對月如臨座遷象室以奉 親羨墻若見乃

致

帝親之悅倏呈川岳之竒特睽

顯陵復垂膏露如脂瑩白萬年枝上綴珠璣若

醴澄甜色雲中流沆瀣不必挺金莖於層
漢而天酒自零何俟盛璃噐於東方而神
漿可挹守臣馳傳先靈雪以告祥太史登
臺同鄉雲而紀瑞于以奏

郊而獻 廟迓重玄滋至之麻用之調鼎
以和丹雘億載昌延之筭誠圖牒之所罕
取而今古之所創觀者也臣等身近蓬瀛

恩偏函露望

帝鄉而忻瞻

帝貺識

帝眷之優隆仰聖澤而均戴
聖親知聖靈之闔懌伏願

鴻圖孔固

皇極長安如日升如月恒如松柏之承祺齡綿
衍極天覆極地載極霜露之墜華夏尊親
○賀瑞雪表

伏以

聖主秉精誠素禱虔修於秘殿

皇穹彰妙應玄滋覃布於仙寰預徵大有之祥
普洽太和之慶神人胥懌朝野均懽恭惟

皇上

德契洪濛

道參混沌

握造化之樞而幹旋六氣雨暘寒燠惟時操
雷霆之柄而役使萬靈天地神祇受職陰
不愆陽不伏金襍奏而玉燭調內以順外
以嚴寶寓寧而瑤圖謚茂膺

帝眷益堅事

帝之忱夙殄民恫愈篤勤民之念維茲靈雪寔
兆康平頃當一陽之交已沾初白妥介二

寒之節未沐重祥乃建

琳壇祇祈

王澤

天心孚格陰雲履作於連朝

昊貺昭垂臘祉遂零於竟夕堯階委素三冬
呈三白之竒漢苑凝華六合舞六花之瑞
集鱗原而璀璨農畷興歌乘蜡月以霏微
豐穰預卜光浮

三極之殿皜如銀海以堆瓊輝涵

萬壽之宮皎若瑤京而疊璐遺蝗悉殄土膏
洽而五穀昭禎餘沴全消烝化調而八埏

普恭此誠

神聖感通之妙用而爲中和位育之極功也
焯等又荷生成罔裨燮理占大田之多稼
喜賡周雅三篇觀

內禁之飛擬續梁園之賦伏願庶徵來備蕃
祉荐臻和天和地和人咸五登三而治世
滋壽滋福滋祿積千累萬以長生

○謝入直表

伏以

特恩超擢方持南省之衡

簡命特臨遽入西宮之直慶遭逢之不偶驚
知遇之非常望

闕趨踰循墻跼躅恭惟

皇上道隆事 帝禮重享親秘殿齋居

聖敬日躋於宥密周廬拱侍寅恭慎選乎臣隣
念秘宗爲禮樂之司而直贊奉神明之典
令同勲輔偕處禁庭顧借諸臣尚歷歲時
之久維茲

召命寔踰

恩例之常篆方視於春曹身忽依於

宸極天顏咫尺喜瞻日月之光華蓋帡幪恍在
雲霄之上以峻阼之賤品而拔寘蓬瀛使
砮礫之微材而綴行貂玉豈惟意念之罔
及蓋亦夢寐所未期彼漢帝之問賈生虛
誇宣室雖宋宗之召蘇軾徒侈金蓮豈若
臣旬日再遷晉拜直廬之任一朝三命叨
躋禁密之華真

九重特命之恩而千載庶明之會也臣敢不
服膺

聖訓竭忠順以事一人恪秉臣忠勵寅清以

佐三禮務効涓埃之駑力仰酬

高厚之鴻私伏願

昊眷滋隆 皇圖永固得祿得名得位丕臻

聖化於無前如山如阜如岡永衍

宸齡於難老

○謝陞禮部尚書兼太子少保學士表

伏以

命渙九天晉陟春卿之任

恩承三錫改兼宮保之階驚異政之駢加感
殊榮之薦沐控辭弗獲循省奚堪臣等誠惶

誠恐稽首頓首伏念臣起自寒微遭逢
神聖謬登甲第自慚鉛槧之庸流虛閱歲時久
玷蓬瀛之妙選心惟戀

主消涖未效於愚忠仕不因人終始悉憑於

睿簡由講官而進拱內撰寵實非常自翰學而
擢貳南宮

恩猶不次茲者秩宗虛席方議僉推而詮疏傳
綸忽膺

特命蓋

聖心預定進之若慮其無由而

宸翰親摛用之惟恐其不速微臣何幸供造如
斯茲蓋伏遇

皇上

道合義軒

德兼堯舜

乾剛獨斷剴裁機務之殷

離照無私洞燭臣隣之隱枉直自分於舉措

恩威莫測其施張慎名器不輕畀人念典禮

尤爲重任知臣才不適用察臣志在効忠瀆

發

淵裏渙頌

隆渥宗伯綴文昌之座翰林依華蓋之星矧
亞保之清噉厠孤卿之華秩使一芥至愚
之質叨

九重駢錫之榮臣敢不矢志寅清勵誠精白
禮樂自

天子出雖莫贊於絲毫籩豆則有司存必靖共
於夙夜伏願

聖躬

天保

帝德日新太和布而宇宙清寧大順昭而禎祥
蕃集神人闔懌常歌有象之太平華夏尊
親永祝無疆之

聖壽

○辭正二品俸表

伏以

萬壽昌辰喜祥開於八月

九霄新命忽寵賜於一朝慚無敬事之勤叨
受越資之賜感深似惕望過所期恭惟
皇上昭明信以格 玄穹升馨香而事

上帝三靈儲祉疊呈三穗之珍禾萬方攸同永
享萬方之王食馭富馭貴奉賞罰於三無
詔德詔功示勸懲於庶位辨等威而慎名
器雖嘖咲之不輕錄尺寸而納涓涘顧

恩私之獨厚遂使臣糠粃末學濫竽中禁之班
美稗賤資冒竊上卿之錄日領大官之給
飫德已深月支餼廩之豐啣 恩益切一
家溫飽誓一飯而不忘九族分周仰
九重而均感臣敢不食其食事其事求追責
於素飡小受小大受大圖勉酬於 玄造

饗飡朝夕殫夙夜匪懈之忠含哺誅詒祝
天地無疆之筭伏願

昊眷申綏安富尊榮之益衍

天庥滋至祿位名壽之增昌獻丹和獲朱禾萬
國和豐而薦瑞

握赤符臨紫極兩儀永泰以同春

○謝賜大紅孔雀紵絛衣一襲表

伏以

命服頒榮荷

聖恩之優眷春衣分寵昭玄祝之殷綏仰戴

鴻慈曷勝雀躍茲蓋伏遇

皇上德合混元道綜遠古宰化而彌綸宇宙建
中以綱紀人文別章服而辨等威庶職罔
裁成之範垂衣而運清淨萬邦蒙衣被之
庥賞必待於有功

命維貴於德顧臣起家韋布慚非鸞鳳之姿混
跡章縫敢望鷺鷥之列詎意遭逢

神聖遂得脫離寒微

賜第承恩竊覩

袞龍之象撰文趨

命獲窺

鴻寶之藏昨廁郎官已畀文鵬之品服今躋

卿貳復頒靈雀之宮緋翠羽金花分竒章

於雲漢綠蕤珠尾出巧製於天機臣敢不

戀玄圃而思棲望 赤霄而解舞忭蹈拜

賜愧無文藻之陸離顧盼生輝幸被纊純之

麗煥期盡忘乎溫飽効寸補於絲綸伏願

撫錦繡之山河履綿長之運祚萬年永壽

常緯地以經天六合同春覩鳳儀而獸舞

袁文榮公文集卷之七終

